

PM lancar 3 projek bernilai RM8 bilion di Cyberjaya

Utusan Online

05 April, 2013

Oleh KHAIRULANUAR YAHAYA

SEPANG 5 April - Perdana Menteri, Datuk Seri Najib Tun Razak hari ini melancarkan tiga projek pembangunan di Cyberjaya, di sini yang bernilai kira-kira RM8 bilion.

Projek berkenaan termasuk pembinaan Masjid Cyberjaya iaitu masjid pertama yang mendapat anugerah Indeks Platinum Hijau bernilai RM62 juta.

Fasa pertama masjid yang dijangka siap menjelang 2015 itu dibina oleh syarikat Koridor Padu Sdn. Bhd. di atas tanah seluas 17.5 ekar dan mampu memuatkan 8,500 jemaah.

Turut dilancarkan projek pembangunan bernilai RM1.02 bilion melibatkan pembinaan 2,500 unit rumah dan komersial yang turut melibatkan pembinaan 794 unit Perumahan Rakyat 1Malaysia (PRIMA).

Sementara projek ke-3 melibatkan pembinaan Pusat Bandar Cyberjaya bernilai RM6 bilion di atas tanah seluas 141 ekar.

Tiga projek berkenaan akan dibina oleh syarikat Cyberview Sdn Bhd.

Dalam ucapannya Najib berkata, dengan pembangunan 3 projek itu Cyberjaya bakal mendapat pelaburan tambahan dengan jumlah keseluruhan bernilai RM20 bilion dalam tempoh 5 tahun.

Bagaimanapun kata beliau, kejayaan pelaksanaan projek tersebut dipengaruhi oleh dua faktor iaitu penyelesaian isu air dengan kerajaan Selangor dan kesinambungan kepimpinan di Putrajaya.

"Untuk merealisasikan impian di Cyberjaya menjadi realiti, maka dua isu ini perlu di atas dan rakyat berpeluang mengubahnya dalam masa terdekat," kata Najib.

Penduduk Cyberjaya yang kini berjumlah 55,000 orang akan meningkat kepada 100,000 menjelang tahun 2017.- UTUSAN ONLINE

Hakcipta Terpelihara © UTUSAN MELAYU (M) BERHAD

Source : http://www.utusan.com.my/utusan/Dalam_Negeri/20130405/dn_21/PM-lancar-3-projek-bernilai-RM8-bilion-di-Cyberjaya